

Tesalonecau nenacaauru rai

Faborohacha letoai leinjiin

Tesalonecau nenacaauru rai laenaauruha Faboroorune

1 ¹Canuna Faboro neeun. Inara raina Siribano, Timoteo, naonjoain nichaanunena laenaain letoarichaanuhin. Saain nii Tesalonecau nenacaauru Cana Coaunera rai ita taojiaera neeichene raina caa laenaain letoacaanu. Saain nii Cana Inaca Cana Coaunera, Cana Curuaanaa Jesocurisito, naonjoain coitucuhin neeichene raina caa letoacaanu. Inara belain, inara coroatajaneine Cana Inaca Cana Coaunera, Cana Curuaanaa Jesocurisito naonjoainte raotojoeiin neeiche.

²Cana Coaunera bajaacaanune naineeina, “Nariha,” naain coroejeein, inara rai bajaacaanu inara coroatajanejeein sacuha Cana Coaunerane coina.

³Nitohaneina inara coacuhin nihacaanu, Cana Inaca Cana Coaunera bajaacaanune naineeinna rauhijiriin inara coroatajanerichaaain Cana Coaunera Calaohi Jesocurisitone esenetaain, caohachaaain laraajiin necairichanaa abaantaain amihanein leeochoaauru belaaain neeichene jaun.

⁴Coichana aina cutaainta inara belai Cana Coaunera. Aihana jaunna, janijiin Cana Coaunera ranojoneein neeichene coitucuhacaanu.

⁵Coatiha joanreen erenaa rijijieein nihei caa cacha relaacaanune jaan Cana Coaunera Ere. Mijiaainetiinte cacha suujua que tacaе, nitohanein tiha Cana Coaunera Suujuene jaun. Nitohanihana jaunna esinae rauhijiriin Cana Coaunera Ere neein nihane coitucuhacaanulu.

Inarate canacaanu ichao coitucuhiche, inara aina nihacaanune bana inara nota que canacaanu coaraquicheluna jaun. Nenacaen inara caohachanu que tejian canacaanu coaraquichelu inara nota que, jericanejeein caohachaaain ichaohichene coina.

⁶Nii jaunte jericanejeein canacaanu ichao rijijieein, Cana Curuaanaa Jesocurisito naonjoain rijijieein inara netonai inara ichao que ichaohiche. Nitohanein caohacha ichaaain ichaohichene corenhate inara rohecaain, inara cairichaerihure niqui, nete inara coroatajaneein naonjoaan Cana Coaunera Suujuene jaun, raotojoeiin rachoojoeiin Cana Coaunera Ere aonaain tonoraache atiin.

⁷Nitohanein atiin laraajiin necairichanaa abaantaain raotojoeiin neeichene jaunte, inara coitucuuruhana jaun, jericanejeein inara rijijieein ichaonaa caohacha que ichaonaa coaacure saain Masedonia, Acaiha, naonjoaihunri nenacaauru Cana

Coaunera coitucuureru. ⁸Nitohaneainte Masedonia batane, Acaiha batane, itolere sacutaain Cana Curuaanaa Ere coitucuerateechene jaun, esinae rauhijiriin Cana Coaunera esenetaain rauhijiriin nere tonoraain neeichene coitucuure itolere neein. Nitohanein itolere neein raotojoein inara coitucuruhanu jaunna, inae cha que erenaa nainenihacaanu canacaanu inae.

⁹Nii jaunte inae acaauru rai cha que irihacaanune latecurene, jauriaa nejeein inara rene turuha uhacaanune jana, canacaanu belaaain, canacaanu raain, canacaanuhacha beebejei Cana Coaunera Ere esenetaain tonoraain, nii enuha caje cacha chanohinein nena inara coaunera niha inaraacha tei jianein raatiriin, esinae rauhijiriin nii ichaohin nena Cana Coaunera Esine Ere esenetaain tonoraain, nii beebejeeiche leeochoauru raine coitucuruha itolere neeina jaun.

¹⁰Chaen techu enacoanein dede caje turuha uha nii Cana Coaunera Calaohi, nii oo caje Cana Coaunera ichatenohin Jesosone cohajeeichene beebejeeure. Nii Cana Coaunera Calaohi Jesosote cana casetecaeratihane rai niha Cana Coaunerane jana jianacoon cana mitaeranein ne.

Tsalonecau namihaneeo ichaa Faborone

2 ¹⁻²Nii coitucuhichene tocokaneinte jauriaa nejeein Filipoo turuhacaanune jana, canacaanu batohin, canacaanu necoejehanuhin, canacaanu que jaolecoorua natiinte, inae enene esinae rauhijiriin aitocoanune coitucuure. Nii coitucuhichene tocoaneeinte canacaanu aina nejerateeuruha nii Tsaloneca cocoaichacurune jana, canacaanu coroatajane Cana Coaunera, acaauru que casilanaala laraajiin inara rai nere bihacaanune coina.

³Nitohaneina joenreein caje rocohin inara relaenihacaanu. Nitohanein

rauhijiriin aitocoaanu natiinte canacaanu ataibinaene beein, naaonjoaaunre canacaanu belaiheichuru, chaelai chunei coritana coacuhin joenreein canacaanu ereniriaala que aitona rijiitiin.

⁴Canacaanu suujua coarajihana jaunte, canacaanu letoae Cana Coaunera, jianacoon cana mitaain, Cana Rai Ichaonaa Tera Nere bihacaanune coina. Coatiha canacaanu belaaain niha cachane jerena caaun cacha relaaain nihaacaanu. Canacaanu belaiha Cana Coaunerane jerena caaunna jerihane tocokanein cacha relaaain nihacaanu.

⁵Nii coitucuhichene tocokanein, coatiha canacaanu coretequichene coina inara belaihaacaanu. Esinae Cana Coaunerate coaraje.

⁶Canacaanu cocoaain canacaanu letoain niha Cana Coaunera Calaohi Jesocurisitona jaunte niqui neere canacaanu rai rauhi. Nena "Naaonjoain canacaanu que suujua acatein neeine cachara," naain erenihacaanu inara rai nihanatiin. ⁷Nechu jataen joenreein cacha rijijieein turuhin, canacaanu nerotohin inara belaaain inara jana amuhemuhecaanulu. Charijieein teeinti bereecuru belaaain fojiae neba. Nii rijijieeina inara belaaain inara relaacaanu. ⁸Coatiha Cana Coaunera Ereeicha que inara relaacaanuneeicha coina turuhin inara aina nihaacaanulu. Inara netonai canacaanu ichao coaraain jerichanejein canacaanu rijijieein ichaohichene coina itolere necairichana abaantaain turuhin nihacaanulu, canacaanu coichana aina cutaain inara belaaain nihacaanune jaun.

⁹Jauriaana janotiinnetojoein, laraajiin mainajein amihaneraetoacaanulune coaauquiche chachu natiin. Nitohaneina canacaanu raajenihane amihanein, coreniha canacaanuhacha

latei coreteen, Cana Coaunera Ere beebejein ichaorejetocooaunlu, nabana inara cairichaacaanune, chaelai que latejihojoiriin neeichene coataa.

¹⁰“Baaso chaainjene nihacaanu,” naain iriha cacha natiin, chatohanein baaso chaain nihaacaanu. Inara, Cana Coaunera, naonjoain neeichenete rauhijiriin canacaanu suujua coaraain, Cana Coaunera coitucuera neeichene que canacaanu suujua acatein nihacaanune coarajerejetocoichelu. Nii jaunte nene nihei chaelai que ujuaitein canacaanu coulurujiha chuneine jaannu.

¹¹Nii choae tacaainachu calaohi suujua nunaain lararajiaa inacane rijijieein inara suujua nunaain lararajiaain nihacaanune coitucuhiche.

¹²Nitohanihana jaun, coujuriu Cana Coaunera coitucuera neein nenea tocuhanein rauhijiriin ichaoche, nii jauriaa inara rai aitocoaanulune tocuhanein raotojoein rachoojoein aina neeichene caina inara cotijiaain nihalu Cana Coaunera jaun.

¹³Coatiba joenreein cacha ere aonajenea rijijieein Cana Coaunera Ere aonajiheeichelu inara rai bihacaanune jana. Nii jaunna Cana Coaunera bajaacaanune, “Nariha,” naain bajaacaanu. Nii caje coauneente esinae rauhijiriin caohachaain inara ichao coreein ichaohichene coaratein neeiche. Nitohanihane cajete esinae rauhijiriin Cana Coaunera Ere nihane que necoarate.

¹⁴Cana Coaunera Calaoi Jesocurisito ere tonoraichene corenihate inara aina nejerateurelu inara araaichuru. Nii rijijieein techu nii Jodeau nenea Cana Coaunera Calaoi Jesocurisito ere tonoraaurera aina nejerateurelu acaauru araaichuru Jorioocuru. ¹⁵Nii Jorioocurute acaauru rai Cana Coaunera ere beera inoansi sohin jaaoruhane

rijijieein Cana Curuaanaa Jesoso sohin jaaorera ne. Nitohaneeuruhana jaunte acaauru aina nihacaanune bana canacaanu sitaurelu. Nihei aansijieei-niji Cana Coaunera jerenohin ichana coaacuruhi, nechu satiin cacha aina obaejeriin ichaauruha neechate laen jerecure. ¹⁶Nii jaunte jianacoon mituhin neeuruha Jorioniheichurune caina, Jorioniheichuru rai Cana Coaunera Ere benaa jerichaanune, caohateure. Nitohaneeuruhana jaunte jataen mululuhin osaquiin neeure. Nii jaunte tabiicha acaauru abaantana nainene Cana Coaunera. Nii jaunte inae cuu tihane, nii core coaraa cuurureein acaauru notaanaa.

Coaiteen Tsalonecau turuha cunaa jeriha Faboro ne

¹⁷Inara caje amuhacaanune caje coauneena, inara coacuhin nihacaanu. Carajaain ita coarinihacache natiene jericha nejeen inara coacuhin nihacaanune jaun, inara coaraa uhene rijitojoihacaanu.

¹⁸Inara coaraa unaa jerichaanune naineeinte canacaanu acate Moconajaera. Canuna Faboro neein caraaje nihane inara coaraa unaa jereun araa saain.

¹⁹Inae coaiteen cau turuha Cana Coaunera Calaoi Jesocurisitone banana, raotojoein rachoojoein nereunni, cacoreniha coitucuhin rai cacha neeichene jaun. ²⁰Nii jaunna esinae rauhijiriin raotojoein rachoojoein nihacaanu.

3 ¹Jataenna inara coaraa unaa jeretohacaanu niqiu, nena nainenerichaanuhin. Nii jaunna cau Atenau nerichaanuhin. ²Acaihanejein cana nejera Timoteeochana letoarichaanuhin inara coaraa uhane caina. Acate Cana Coaunera letononein canacaanu

coroatajane, Cana Coaunera Ere benaa que. Nii jaunte inara coaraa ureein, inara suujua lararajiaain nihane, nii aina nelararajiaain, inara suujua nunaain neeichene coina, ³nabana chatohaneein nejelau suujua cuaain niha chuneine coataa. Inarate raotojoein niriinanai coitucuhiche. Saain nitohaneein necairichanaa coaraain nihacache nete ne. ⁴Nii inara aina nihacaanune bana, inara rai aitocaaanulune tocuhaneinte nelu cana suujua reroecaeraauru. Nitohaneinte situelu, nii coitucuhichene tocuhaneein. ⁵Nitohaniha jaunna inara coarateeunlu. “Esinaete chuhisi rauhijiriin Cana Coaunera Calaohi Jesocurisito ere esenetaain tonoraain neeure,” naain nitohaneein coitucuhaneinte jerena caaunna inara coarateeunlu. “Baaso que sarunajaain niha Moconajaerane, baaso chaain neeuruhane inacojoein inachujian acaauru rai Cana Coaunera Ere benaa que amihanihacaanulu,” naanune jaunne, inara coarateeunlu, nitohaneein coitucuhanune coina.

⁶Nii jaunna nitohaneein esinae rauhijiriin Cana Coaunera Ere esentaain, tonoraain ita belaaain, raotojoein neeichene coitucuun, inara caje turuhin biha Timoteo canacaanu raina jaun. Chaen techu canacaanu belaaain canacaanu coacuhin, canacaanu coana jeretohichene be. Inara coana jeretohacaanune rijitjoein canacaanu coana jeretohichene be canacaanu rai.

⁷Nii jaunna necairichaacaanu natiin, raotojoein nii que nelararajiaain atiin rachoojoein nihacaanu. ⁸Nitohaneein rauhijiriin Cana Curuaanaa ere tonoraain neeichene jaunna, cha que tonajelanaala nihacaanu. ⁹Nii jaunna inara coreniha, “Nariha jataen,” naacaanu, Cana Coaunera notaracae.

¹⁰Nii jaunna janotiin netojoein Cana Coaunera bajaain nihacaanu, canacaanu coroatajanihane inara rene turuhin inara rai beebjihacaanune, jataain jelai amuritoheriin esenetaain queecha jaaequiin neeichene coina.

¹¹Aihana jaunna canacaanu coroatajanihana Cana Inaca Cana Coaunera, Cana Curuaanaa Jesocurisito naaonjoaine jerichaanu inara coaraa uhacaanune coina. ¹²Inara coroatajaneeine Cana Curuaanaate jelai amuritoheriin esenetaain, tonoraain neein ita belaaain, cachaauru belaaain, naaonjoaain neeiche inara belaichaaunne rijitjoein.

¹³Aihute nitohaneein rauhijiriin inara suujua coaraain ichaohichene jana inara eruhine Cana Coaunera Calaohi Jesocurisito, rainein nenacaauru aina turuha uhane bana.

Nitohaneein ichaoha cachane jeriha Cana Coaunerane

4 ¹Cana Curuaanaa Jesocurisito coitucuera neeichene jaunna, atiin inara rai aitorichaanuhin, nii jauriaa inara relaacaanune rijijieein ichaohin neeichene coina. Nenacaenjian jelai choae jauhecotojoeriin neeichene coinana aitocaaanu, nitohaneein jeriha Cana Coaunerana jaun.

²Inarate nere coitucuhiche, canacaanu que inara relaeatiha Cana Curuaanaa Jesocurisitona jaun. ³Acaiha nejein nere tonoraaiiche neechate jere Cana Coaunera. Nabana ita raelanaala ene aina ichaojeraquiiin niha chuneine coataa. ⁴Acaiha nejein sinijiera ainaacha ita jereein jiniiquiin suujua coarain niha cacha nete caohachae.

⁵Caohachaa, Cana Coaunera coitucuu-ruhi rijijieein inara suujua coarihei amunein neeichene. ⁶Coa nejesinajeein ita coritaain ita shaquiiin nihache. Nitohaneein neinihanete banajelanaala

choae osa nalutiareein Cana Curuaanaa, nii core coaraain nihane coina, nii inara rai aitiin inara relaain bihacaanulune tocohaneein. ⁷Coatiha canaacha jerei ichaechajeein ichaonaa coina cana cotijiaain, cana raain niheilulu Cana Coaunera. Rauhijiriin cana suujua coaraain ichaohacachene coinete cana raain nelu Cana Coaunera. ⁸Cha teinti, caa inara relaacaanune jaan batoo. Nihei canacaanu batoha aitorinaain. Nechu nii rai Suujue que cana suujua lararajiaera Cana Coaunera batohate aitoreein.

⁹Jiniiquiin raotojoein ita belajijeein saain itolere cacha belaa ineeichene coina, inara relaa Cana Coaunera jaunna, inae nii que inara relanaa nainenihacaanu. ¹⁰Nitohaniha jaunte, saain Masedonia nenacaauru Cana Coaunera coitucuurera belaa ineeiche. Nii jaunna jelai choae jauhecotojoeriin inara suujua coaraain inara amute cacha belaa ineeichene jereun. ¹¹Inara letoacaanune tocohanein raotojoein ichaohin, nihei casaje que erena coacuelanaala inara amihaneecha ichacuche. ¹²Aihute inara que suujua acatein naaonjoan-ruhine Cana Coaunera coitucuruhi.

Coaiten turuha uha Cana Curuaanaane

¹³“Naaonjoaante neeure Cana Coaunera Calaohi Jesocurisito esenetaain onacaauru,” naain inara netonai coitucuhicheneena jerichaanu. Nabana cha coitucuneeichene ohin naaonjoan chuneine, nabana Cana Coaunera coitucuruhi cachaauru rijijieein jataen tabai inaderanaa que inaderaain neeichene coataa.

¹⁴Charijieein teeinti, ohin ichanae Cana Coaunera Calaohi Jesoso, nii rijijieein techu aina ichanaa cuurureein esenetaain onacaauru.

¹⁵Nii jaunna inara rai aitocooaanu, cacha relaa Cana Curuaanaane rijitoein. Cha teeinti, coaiten turuha uha Cana Curuaanaa neren tiaain ichoae, nii ichoaichaniha onacaauru ajiniha Cana Curuaanaa aina niha curinaain. ¹⁶Letonocuru- anjeraauru curuaanaa que beratiha Cana Coaunera- nete inae toniha Cana Coaunera rai jaihane jana, dede caje fauha uha nii Cana Curuaanaane, ichanaa cuurureein esenetaain onacaauru. ¹⁷Nii baihate acaauru aina jiniiquiin nihacachene coina, dede sacari jana Cana Curuaanaa aina ita ruhine curichaachein jiniiquiin. Nitohanihanete Cana Curuaanaa aina niha curichaachein cha bana satonoe-lanaala. ¹⁸Aihana jaun caa erena que ita suujua lararajiaain neeuche raotojoein.

5 ¹“Naaonjoain banate turuha ureein Cana Curuaanaara,” naain coitucuhichene tocohanein. ²Nii coitucuhichene tocohaneinte cha coatajeniha chuneine jana turuha ureein. Charijieein teeinti janotiin turue asijiauto. Nii rijijieinte turuha ureein. ³Nitohanerichaine banate, “Jataain raotojoeinte ichaohacache. Coatiha nihei cana que nejeratein chatohanein cana ichao itajeranu,” naain ereein neeurureein Cana Coaunera coitucuruhi cachaauru. Nii lacuritiinte caseteco coaraa cuurureein luhecotariin, acaauru casetecaa Cana Coaunera ne. Nihei chunijihun cuhin nichotena nainecururinaain. Charijieein teeinti, canaanai sirihane, inae saa rai batenene, rai cunaane, cuna caje nichotena nainene. Nii rijijieein techu luhecotariin cau turuha Cana Curuaanaane acaauru casetecane nii cuna aonacurureein. ⁴Jana inara laen nesoona coariheecheein, cohajeichene jana

tururichaaina jaun. ⁵Cana Curuaanaa jerenohin coitucuhin tonoraachene jaunte, jiichoo conaera- cono cachanein neeiche. Coatiha Cana Curuaanaa ere tonoraauruhi rijijieein nocohenaana nenea cacha neein nihaacache. ⁶⁻⁷Nii jaun nainiheini ninauhene neein ajenacaauru rijijieein nihacachene. Itolere bana cana suujua coaraain nihacache nete caohachae. ⁸Charijieein teinti, nalarijia que coata teure soondarooru, acaauru jaberoco acateraanu que, nabana chatohanein tenajaera nihane, acaauru que temuhin nihane coataa. Nii rijijieein techu inara netonai, cana acateraanu que Cana Curuaanaa esenetaain, tonoraain, ita belaaain, cacha belaaain, naaonjoain nihacachenete cana acatera niha nereein nii canaacha esenetai. Nitohaniha cachene cana rohan nichuutaain cana coritana nainenereein Moconajaera. Charijieein teinti, coata caje ichanohin asiho lauriae soondaro, nabana chatohanein couturi tiha aina nejerateine coataa. Nii rijijieein techu, chatohanein cana suujua tenaa nainenereein Moconajaera, batoelanaala esinae rauhijiriin jianacoo cana mitaa Cana Mitaerane esenetaacachene. ⁹Coatiha caseteco coaraain nihacachene coina, cana raain nihei Cana Coaunera. Rai Calaoihi Jesocurisito coreniha jianacoo mituhin nihacachene coinete cana raain ne Cana Coaunera. ¹⁰Ohacachene nihanatiin aina nihacachene coinete cana coreniha ohe Cana Coaunera Calaoihi Jesocurisito. ¹¹Nii jaun nii aachene rijijieein jiniiquiin ita suujua lararajiaain laraajiin neeuche.

**Satono nejeein Cana Coaunera
coitucuurera suujuatiha Faborone**

¹²Aonacuchena inara rai irihacaanu. Nii inara beraihurera que inara suujua

acatein, nere tonoraain neeuche, Cana Coaunera coitucuurera beraichanein neuruhana jaun. ¹³Nii jaun acaauru que inara suujua acatein belainajaain, leeochoauru aina jiniiquiin raotojoeein neeuche.

¹⁴Amihanenaa jeriheichuru cotaicha rijitiin suujuatein letoaauche. Chaen chu nererojoecaaain nenacaauru belaaain suujuateechete, suujua tocharaain suujua nunaain neeuruhine. Chaen chu nacanacaenaauru corotajanecuche. Raotojoeein satii acaauru suujuatein, acaauru suujua lararajiaain neeuche.

¹⁵Coaracuche, jiaonriha inara rai baaso chara nihane coa nacatiha tacaain cainaain nihache. Ita belaaain, saain itolere cacha, Cana Coaunera coitucuuru nihanatiin belaaain neeuche.

¹⁶Raotojoein rachoojoeeriin neeuche inetono janonaa bana. ¹⁷Cana Coaunera bajaabajajeein neeuche inetono janonaa bana. ¹⁸Chatohanein inara tera nihane nihanatiin coroaecuche, nitohanein coujuriu Cana Coaunera Calaoihi Jesocurisito esenetaera neein nenea tocohaneein neeichene jeriha Cana Coaunerana jaun.

¹⁹Inara suujuatenaa jeriha Cana Coaunera Suujuene, aonaain tonoracuche.

²⁰Cana Coaunera Ere biha Cana Coaunera letonone, nijiaonriha batohin neeichene. ²¹Esinae rauhijiriin suujua coaraain inara relaacaanune rijitojoein inara relaaauruhane esenetaain tonoraacuche. ²²Itolere baaso jianein neeuche.

²³Acaiha nejein nere esenetaain tonoraera neein neeichene coina inara suujua coreine atiin cana rai raoti ichaonaa tera Cana Coaunera. Aihute neculocohin neeine inara jaberoco, inara suujue aina coateen turuha Cana Curuaanaa Jesocurisito nereein tiaain.

²⁴Nitohaneeinte ichareein nii Inara Cotiharalu, nitohaneein nihana jaun.

**Laenaane satononiha acaauru
corojeein acaauru coaucane biha
Faborone**

²⁵Cana Coaunera bajaauche canacaanu rai atiin.

²⁶“Inara coaacuruha jera Faborooru,” naauche satiin cana

nejeraauru Cana Coaunera coitucuu-rera rai.

²⁷Aihana jaun acaauru rai caa canuhacha laenai ereretaauche, Cana Curuaanaa letoeratenojohin neein nihana jaun.

²⁸Inara coroatajaneleine Cana Curuaanaa Jesocurisitote raotojoein neeiche.

Nitohaneein neeine.